

AKASHVANI AIZAWL

REGIONAL NEWS UNIT



GANDHI JAYANTI

India hnampa Mahatma Gandhi pianchamphaphak vawi 156-na, Gandhi Jayanti pualin tukin khan Larsap General (Dr) Vijay Kumar Singh (Retd) leh Mizoram Sawrkara mi pawimawh dangten zahna an lantir.

Tukin dar 7:30 a Gandhi Jayanti pual a PUC Campus, College Venga Mahatma Gandhi lima pangpar dah a, zahna lantir zingah hian Acting Chief Minister Pu Vanlalhlana, Mizoram Legislative Assembly Speaker Pu Lalbiakzama, Environment, Forest & Climate Change Minister Pu Lalthansanga leh Health & Family Welfare Minister Pi Lalrinpuii te bakah Chief Secretary Pu Khilli Ram Meena, DGP Pu Sharad Agarwal leh Sawrkar hotulu dangte an tel a. Hun hman zawh hian Larsap leh official-te chuan Pu Gandhi-a ngaihpawimawh faina leh vantlang rawngbawlna lantir nan Swachhata hi Seva pualin tual an phiat fai a ni.

Aizawl veng hrang hranga local council leh YMA branch-te huaihawtin veng chhung thenfai hnatlang an thawk a. Khaw chhe karah mi thahnem tak hnatlangin an thawk chhuak a ni.



SWACHHATA RALLY

Tukin zing dar 7:30 AM khan Swachhata Rally (Faina kawng zawh), Swachhata Hi Seva kharna hun leh Faina Hapta hawnna hun chu Lawngtlai Areopagy-ah buatsaih a ni.

Lawngtlai district bawrhsap Pu Donny Lalruatsanga chuan sorkar laipui in faina a ngai pawimawh in a lawmna hun hrang hrang a huaihawt thin a, khawvel ram dangte ang leh ram dangte entawn turin faina kawngah hma a la mek a ni a ti bawk. Faina kawngah hian Sorkar tih mai a tawk lo a, mitin district faina kawngah an pawimawh a chhungkua, in leh lo leh a vel tihfai a bul tanin veng, khua leh district-in faina kawngah hma a sawn ang, a ti a ni. Swachhata Rally-ah hian LADC Sanitaion & Waste Management Officer Pu C. Lawmsangzuala kaihhruai-in Swachhata thutiam sawi rual a ni a. Reels siam intihsiakna result puan leh lawmman semna hun hman a ni bawk.

Swachhata Hi Seva (17 September- 2 October) hman hun chhung hian Lawngtlai khawchhunga zirna In 8 leh sawrkar Office -19 te'n thu intiamkamna sawina hun an hman a. Lawngtlai khawpui chhunga zirna In10 leh sawrkar pisa14-ah te faina hnatlang huaihawt a ni bawk. September ni 29 khan Sanitaion Department hnuaia thawkte tan 'Free Health Check-up' buatsaih niin, Mobile Medical Unit- ten an hriselna dinhmun hi endik sakin, mi- 26 te health check-up buatsaih sak an ni.

(DIPR)



DRUG SEIZURE

Kumin thla kaw chhung (January leh September inkar) khan Excise & Narcotics department hnathawktute chuan heroin kg 41 leh gram 432, leh methamphetamine kg. 229 leh gram 890 an man tawh.

Department thupuangtu Pu Peter Zohmingthanga sawi danin heroin leh methamphetamine bakah hian crystal meth kg 48 leh gram 061 zet an man bawk a. Crystal meth hi a muma siam ni lovin a tlang a ni a, a man a to hle ni a sawi a ni. Hei bakah hian ganja kg 198 leh gram 853, opium kg 1 leh gram 193 an man a, damdawi ruih theih dang chi hrang hrang - khuh damdawi leh thalaite'n an hmansual chi dang dang tam tham tak an man bawk a ni.

(Desk)



OPERATION JERICHO

Mizoram sorkarin ruihhlo tawlh leh ruihhlo ngaite laka beihpui a thlak mek lai-in ruihhlo thahnem tham tak man zui zel a ni.

Home Minister Pu K. Sapdanga kaihhruaina hnuaia Police, Excise & Narcotics department leh Central YMA te'n 'Jeriko Beihpui' (Operation Jericho) hming vuaha ruihhlo tawh leh ruihhlo ngaite laka mipui mimir himna atana beihpui an thlak mek lai-in an insawrbingna ber Champhai district-ah ruihhlo thahnem tak man reng a la ni a. He beihpui hi September ni 1 atanga thlak tanin December ni 31 thleng kalpui tura ruahman a ni a. IGP Pu H. Ramthlengliana hovin Central YMA hruiute chuan Champhai district a Myanmar ramri hrula ruihhlo tawlhute'n luhka atana an hmante chu a bul hnai khua a YMA branch hruiute nen an fang a. Khawtlang leh YMA hruiute nen inkawmin beihpui thlakna a thawhho dan turte an rel a. Excise & Narcotics department a thawkte chu mipui mimir tana harsatna siam thei ruihhlo ngaite zalen lutuka khawlai a an chet lohna turin a tul anga khawm tura ruat an ni bawk.

September thla chhung khan Champhai district bikah Champhai District Police-ten Narcotic Drugs & Psychotropic Substances Act, 1985 hnuaiah ruihhlo kaihhnawiha in hnam hnawih mi 25 manin, thubuai 19 an ziaklut a. September thla chhung hian heroin kg 3 leh gram 282, methamphetamine kg 74 leh gram 852, Alprazolam kg 4 leh gram 470, codein gram 1 point 6 bakah ruihhlo phurh nana hman lirthei ke li nei pahnih leh lirthei ke pahnih nei pahnih man a ni bawk. Ruihhlo man zawng zawng hlut zawng hi cheng vaibelchhe 11 leh nuai 66 chuang hu a ni.

Hemi hun chhung vek hian Champhai district Excise & Narcotics hnathawkte chuan ND&PS Act, 1985 hnuaiah ruihhlo kaihhnawiha in hnam hnawih mi 10 manin thubuai 8 an zia lut a. Heroin kg 2 leh gram 772, methamphetamine kg 42 leh gram 88 leh Ganja gram 29 point 9 leh ruihhlo phurh nana hman lirthei ke hnih nei pahnih an man bawk a ni.

(Desk)



MTDA

Mamit District kawng chu lirthei tlan hleih theih loh khawpa a chhiat avangin siamthat a nih hma chu vawiin atangin Buhfai phur truck a tlan tawh dawn lo.

Mizoram Truck Driver’s Association chuan thuchhuah siamin, khawthlang lam kawng chu hun rei tak atanga chhia a ni a, mipui mamawhna avangin an tlan hram hram thin laiin tun dinhmunah tlan hleih theih loh khawpin a chhe zual a, motor a chhiat phah nasat bakah nunna atan pawh a hlauhawm tak avangin kawng chu tlan ngamna khawpa siamthat a nih hma chuan Buhfai phur truck te chu vawiin October ni 2 atangin an tlan tawh dawn lo tih an sawi.

Hemi chungchanga Akashvani Aizawl zawhna chhangin, MTDA President Pu H Laldingliana chuan hun rei tawh tak atang khan kawng khuar nasa leh chhe lutuk avangin tlu lek lekin an tlan fo a ti a, buhfai an phur thin zatve vel tunhnaia an phur chung pawn kawng khuarah an la tang thova, an lirthei in a tawrh bakah nunna atan a hlauhawm avangin buhfai phur driver te zingah tlan ngam an awm tawh lova, MTDA committee chuan thuneituten kawng khuar zualpui an hnawh sak hma chu tlan tawh loh an rel a ti a. Tun dinhmunah Mamit District kawngchhia avang hian buhfai phur truck 6 chu tlan ngam lovin an ding mek tih a sawi bawk a ni.

(Corr: maremi)

